



ՀԱՅՐԱԴԵՏԱԿԱՆ ՊԱՐԳԵՎԱԲԱՇԽՈՒԹՅՈՒՆԻՅ ՀԵՏՈ

**«Ս. ՍԱՀԱԿ - Ս. ՄԵՍՐՈՊ» ՇՔԱՆՇԱՆՆԵՐ
ՌԱԴԻԿ ՄԱՐՏԻՐՈՍՅԱՆԻՆ
ԵՎ
ՎԼԱԴԻՄԻՐ ԲԱՐԽՈՒԴԱՐՅԱՆԻՆ**

Հունիսի 8-ին Մայր Աթոռ Սուրբ Էջմիածնում, Վեհաբանի հանդիսությունների դահլիճում, Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը «Ս. Սահակ - Ս. Մեսրոպ» շքանշաններ հանձնեց ՀՀ ԳԱԱ նախագահ, Գերագույն Հոգևոր Խորհրդի անդամ տիար Ռադիկ Մարտիրոսյանին և ԳԱԱ Հայոց պատմության և հասարակական գիտությունների բաժանմունքի ակադեմիկոս-քարտուղար, Գերագույն Հոգևոր Խորհրդի անդամ տիար Վլադիմիր Բարխուդարյանին:

Շքանշանի հանձնման հանդիսությունը բացվեց Մայր Աթոռ Սուրբ Էջմիածնի դիվանապետ Տ. Արշակ եպիսկոպոս Խաչատրյանի ողջույնի խոսքով:

ԳԱԱ փոխնախագահ Յուրի Շուքուրյանը և ԳԱԱ Պատմության ինստիտուտի տնօրեն Աշոտ Մելքոնյանը ներկայացրեցին մեծարյալների գիտա-հասարակական գործունեությունը:

Մեծարյալներին գնահատանքի խոսք ասացին նաև ակադեմիկոսներ Նիկոլայ Հովհաննիսյանն ու Սերգեյ Համբարձումյանը՝ շնորհակալություն հայտնելով Նորին Սրբությանը՝ մշակույթի ու գիտության գործիչների նկատմամբ մշտապես ցուցաբերվող ուշադրության և Հայրապետական գնահատության համար:

Ապա «Էջ Միածինն ի Հորե» շարականի երգեցողության ներքո ներս բերվեցին Հայրապետական սրբատառ կոնդակները և ընթերցվեցին Մայր Աթոռ Սուրբ Էջմիածնի միաբաններ Տ. Արարատ եպիսկոպոս Գալթագճյանի և Տ Անուշավան եպիսկոպոս Ժամկոչյանի կողմից:

Տիար Ռադիկ Մարտիրոսյանին տրված կոնդակում ի մասնավորի ասվում է. «...Դուք անխոնջ նվիրումով, գիտական ու մանկավարժական արդյունաշատ գործունեությամբ Ձեր կյանքի ողջ ընթացքին ազնիվ ծառայություն էք մատուցում Հայրենի մեր Երկրին ու հավատավոր ժողովրդին: Երևանի Պետական համալսարանում Ձեր ուսումնառությունն ավարտելուց հետո Դուք մնացիք մայր կրթօջախում և տասնյակ տարիներ Ձեր կարողություններն ի սպաս բերեցիք համալսարանին՝ նախ որպես դասախոս, ապա որպես ռեկտոր: Մենք տեղյակ ենք, թե համալսարանում Ձեր երկարամյա պաշտոնավարության ընթացքին ինչպիսի նախանձախնդրությամբ ներդրեցիք Ձեր ջանքերը, որպեսզի համալսարանը, իր կոչմանը հավատարիմ, շարունակի գիտության լույսը մատովակել երիտասարդ հայորդյաց և նրանց հոգիները սնել Սահակ-մեսրոպյան դպրոցից սկիզբ առնող ազգային մեր սրբազան արժեքներով» (տե՛ս էջ 20):

Տիար Վլադիմիր Բարխուդարյանին տրված կոնդակում ասվում է. «...Ավելի քան հիսուն տարիներ Դուք Ձեր ջանքերն ու նվիրումն էք բերում Հայոց պատմության տարբեր հարցերի լուսաբանմանը և նպաստում, որ մեր ժողովրդի հոգում արթուն լինեն անցյալի հիշատակներն ու արժեքները: Ձեր բազմաթիվ ուսումնասիրություններն ու հոդվածները, կազմած դասագրքերը, միջազգային գիտաժողովներում Ձեր զեկուցումները կարևոր ավանդ են հայրենի պատմագիտությանը և ճանաչում են բերել Ձեզ Հայաստանում ու նրա սահմաններից դուրս» (տե՛ս էջ 22):

Կոնդակի ընթերցումից հետո Նորին Սրբությունը մեծարյալների կուրծքը զարդարեց «Ս. Սահակ - Ս. Մեսրոպ» շքանշանով:

Շքանշանի հանձնումից հետո երախտագիտության խոսք ասացին մեծարյալները:

Տիար Ռադիկ Մարտիրոսյանն իր խոսքում ասաց. «Մեծ պատիվ է այսօր ինձ համար Հայոց Հայրապետի ձեռքից ստանալ մեր Եկեղեցու բարձրագույն պարգևը: Ես կարծում եմ, որ այն Վեհափառի կողմից արժանավորումն է կրթության և գիտության ոլորտում իմ համեստ ավանդի: Ինչ վերաբերում է իմ վաստակին մեր Եկեղեցու գործունեության ասպարեզում՝ այն շատ չնչին, համեստ է, և այս պարգևը ես տեսնում եմ որպես պարտավորություն. պարտավորություն հետագա այն անելիքների, որ մեր մտավորականությունը պետք է կատարի մեր Եկեղեցու հետ ձեռք ձեռքի տված»: Պրն Մարտիրոսյանը նշեց, որ մտավորականներն անելիքներ շատ ունեն. հատկապես կարիք է զգացվում մեր ժողովրդի կյանքում և նրա լեզվի, մշակույթի, ինքնության պահպանության գործում Եկեղեցու ունեցած մեծագույն դերի արժեվորման համար ակադեմիական խորը ուսումնասիրությունների: Պրն Մարտիրոսյանը կարևորեց այն հանգամանքը, որ հատկապես վերջին շրջանում՝ Գարեգին Բ Ամենայն Հայոց Կաթողիկոսի շնորհիվ, հնարավոր է լինում հասնել շատ խնդիրների լուծման՝ ի մասնավորի ընդգծելով նաև Եկեղեցու և Պետության հարաբերությունները կարգավորող օրենքի ընդունման նշանակալիությունը: «...Ես ուզում եմ կոչ անել մեր բոլոր մտավորականներին, որ այն համագործակցությունը, որ ստեղծել է մեզ համար Գարեգին Երկրորդ Հայրապետը, շատ բարձր գնահատենք և մեծ նվիրումով աշխատենք այն խնդիրների ուղղությամբ, որոնք այսօր հուզում են մեր Եկեղեցուն, մեր ժողովրդին և մեր երկրին», - եզրափակեց իր խոսքը Ռադիկ Մարտիրոսյանը:

Տիար Վլադիմիր Բարխուդարյանն իր խոսքում ասաց, որ 12 տարի Գերագույն Հոգևոր Խորհրդի անդամ լինելու շնորհիվ ինքը առավել է կապվել Մայր Աթոռ Սուրբ Էջմիածնի հետ, և այդ կապը լավագույնս նպաստել է ըմբռնելու այն մեծագույն դերը, որ ունեցել և ունի մեր ժողովրդի կյանքում Հայ Առաքելական Եկեղեցին: «Հայ Եկեղեցու պատմությունը ոչ այլ ինչ է, եթե ոչ հայոց պատմություն: Հայ Եկեղեցին ստեղծել է թե՛ հոգևոր, թե՛ նյութական մշակույթի մնայուն արժեքներ և այդ արժեքները պահպանելը և փոխանցելը սերունդներին ոչ միայն մեր հոգևորականության, այլև մտավորականության կարևոր գործն է», - ասաց տիար Բարխուդարյանը և, անդրադառնալով հայագիտության մեջ առկա խնդիրներին, վստահություն հայտնեց, որ Վեհափառ Հայրապետը կշարունակի իր աջակցությունը բերել մեր մշակույթի և գիտության, այդ թվում և հայագիտության զարգացմանը:

Հանդիսությունը փակվեց Ամենայն Հայոց Հայրապետի օրհնության խոսքով: Վեհափառ Հայրապետը նշեց, որ Հայ Եկեղեցու «Ս. Սահակ - Ս. Մեսրոպ» բարձր պարգևը տրվում է կրթության, գիտության և մշակույթի ոլորտի եկեղեցանվեր երախտավորներին, ովքեր շարունակողներն են դառնում Ս. Սահակի և Ս. Մեսրոպի առաքելության: Նորին Սրբությունն իր խոսքում ասաց. «...Մենք մեզ գորեղ ենք զգում՝ տեսնելով մեր մտավորականությանը կանգնած մեր կողքին, մեր եկեղեցական սպասավորների հետ ծառայության մեջ՝ և՛ հոգևոր, և՛ աշխարհիկ ոլորտներում: ...Եկեղեցին միշտ էլ հովանավորող է եղել մեր մշակույթին, գիտությանն ու կրթությանը: Դժբախտաբար այնպիսի ժամանակներ բաժին ընկան մեր Եկեղեցուն, որ նա չկարողացավ այդ ոլորտում առավել աջակցություն ունենալ և այդ առաքելությունն ամբողջականորեն իրականացնել: Եկեղեցու առջև ծառացավ հոգևոր կյանքը վերակազմակերպելու և վերակառուցելու խնդիրը: Փառք Աստծո, այսօր աստիճանաբար լուծվում են առկա խնդիրները, և մենք աստիճանաբար Աստծո

օրհնությամբ և օգնականությամբ պիտի կարողանանք վերադարձնել Եկեղեցուն այդ պատվավոր տիտղոսը՝ հովանավոր հայ գիտության, կրթության և մշակույթի»:

Նորին Սրբությունը ուրախություն հայտնեց, որ նման բարձր շքանշանով զարդարում է մեր ժողովրդի ու Եկեղեցու երկու արժանավոր զավակների կուրծքը, վերստին բարձր գնահատեց նրանց՝ հայ ժողովրդի և Հայաստանյայց Առաքելական Սուրբ Եկեղեցու հանդեպ արդյունաշատ գործունեության միջոցով ցուցաբերվող նվիրումը, սերն ու հավատարմությունը և նրանց մեծ վաստակը մեր մշակույթի ու գիտության անդաստանում:

Հանդիսության ընթացքում արևմտաեվրոպական և հայ կոմպոզիտորների ստեղծագործություններով ելույթ ունեցավ մեներգչուհի Ծովինար Ամիրյանը:

ՄԱՅԸ ԱԹՈՌ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ